



Aqqalu C. Jerimiassen

UKA 2020/125

Atassut

12. oktober 2020

**Nunatsinni inulerinermi; isumaginninnikkut, perorsaanikkut, peqqissaanikkut, tarnillu  
pisussaanik ilisimasaqarnikkut atorfissaqartinneqartut ataatsimoortumik  
pilersaarusiornikkut pisariaqartitatta qanoq anguneqarnissaanerat pillugu apeqquteqaat  
aallaavigalugu oqallississiaq.**

(Inatsisartunut ilaasortaq Peter Olsen, Inuit Ataqatigiit)

Taamatut annertutigisumik nunatsinni isumaginninnikkut suliassarujussuaqarnerput takussutaavoq ukiorpassuarni pingaarnersiusarnitsinni kukkuluttorsimasugut. Nassuerutigisariaqalerparpullu ukiorparujussuarni namminiilivinniarnermik anguniagaqarneq inituallaarujujussuarsimasoq. Piareeqqanata oqartussaaffinnik angerlaassisarsimavugut, aningaasatigut sulisutigullu nammassinnaanngisatsinnik. Tamanna uggornarujussuaqaaq, allaallumi namminiilivikkusungaaratta meerartannguagut sanngiitsortagullu tunulliuttarsimallugit inuiattut tulluusimaarnerujussuatta aqqani.

Piffissanngorpoq inuiattut tulluusimaarnerujussuaq illukartilaarallarnissaa, namminiilivinniarnerujussuullu tunulliukkallarnissaa, inuttullu, ilaqtariittut, immitsinnut artukkerata inuunermi pingaernerpaat salliukkallarnissaannut. Aningaasarparujussuummi takorluukkamut kusanartumut atoqattaaginnarsinnaanngilagut.

Piffissanngorpoq eqiterussinerujussuaq millisassallugu. Oqartussaaffiit kommuniniittussat, soorlu akiliisitsiniartarnermut oqartussaaffik, kiisalu motorilinnut akitsuusersuisarifiup kommuninut akisussaaffik tunniunneqarnissaa. Peqqinnissaqarfittalu naalagaaffimmiiit isumagineqartalerpat sumiiffinni tamani pisariaqartitsineq naapertorlugu suliarineqartalernissaa qulakkeertariaqalerparput. Sutigut tamatigut inuup peqqissusaa qitiusuaannartariaqarpoq. Tamannalu Atassummiit inuk qitiutillugu sulinitssinni uteqattaartuassavarput.

Ilaqtariinneq sukarsuarni pingaernerpaajuvoq. Pikkorinnerulerteriaqarpugut angajoqqaatut pisussaaffippit annerpaamik eququutissallugu, inuaqatigiittut ilaquaasutullu akisussaaffimmik kivitseqataasariaqarpugut ilaqtariittut artorsartunik naammattuuigutta. Meeqqammi inuunermi annerpaarpaamik angajoqqaaminiit sunnigaavoq. Pisariaqarfinnilu pinngitsoorata pisortaniit akiliuuttariaqarpugut, meeqqap innarligaarujujussuarnissaa utaqqiinnarnagu.

Piffissanngorpoq tamakkiisumik, nukiillu tamaasa atorlugit meeqqat pitsaanerpaamik peroriartornissaat anguniagassatut inississallugu. Assaat kissaalaartut amerlisassagutsigit, atugaat pitsaanerpaarpaamut inissinneqartariaqarput, ilinniakkatut soqutiginarsassagutsigu.

Ajoraluartumilli aamma maanngaanniit eqqaasariaqarpara, maani qinikkatut sulisugut, immitsinnut sullikkunnaarluta, maniguulluta, inuk qitiutillugu sulilluta kiffartuussissasugut. Issiavik kissalaartoq piunnaarlugu.